

FISKALITATEA. Uztailean Araba, Gipuzkoa, Bizkaia eta Nafarroako zazpi arau fiskalen aurkako ebazpena kaleratu zuen Europako Batzordeak, eta pizgarriak baliatu zituzten enpresei dirua itzultzeko exijitu zien.

EBk zigortutako neurri fiskalen alde helegiteko bideak zabalik

Eusko Jaurlaritzak eta Araba, Bizkaia eta Gipuzkoako Foru Aldundiek pizgarri fiskalak defendatzeko Europar Erkidegoetako Justizia Auzitegira joko dute

Ivan Santamaria | GASTEIZ

Eusko Jaurlaritza eta Araba, Bizkaia eta Gipuzkoako Foru Aldundiak ez daude prest Europar Batzordeak iragan uztailean bi pizgarri fiskalen kontra hartutako erabakia bere horretan uzteko. EBk EAEko fiskalitatea zigortzea deliberatu zuen, eta pizgarriak baliatu zituzten enpresek dirua itzuli beharko dutela ohartarazi zuen.

Eusko Jaurlaritzak atzoko gobernu bileran onartu zuenez, helegitea aurkeztuko du ebazpenaren aurka. Halaber, Arabako Foru Aldundiak gauza bera egingo duela iragarri zuen komunikatu batean, «Bizkaia eta Gipuzkoarekin koordinaturik».

Aurtengo uztailaren 11n Mario Monti Europako Lehiarako komisarioak jakitera eman zuen euskal fiskalitatearen kontrako epaia. Zazpi ziren zabalduetako espedienteak. Horietatik hiru Araba, Bizkaian eta Gipuzkoan aktibo finkoetan inbertitzeko zegoen %45eko mailegu fiskalari zegozkion. Gainontzeko laurak, berriz, *opor fiskalak* modura ezagunak dira, enpresak etekinak izaten zituen lehenebiziko lau urteetan Elkarleen Gai-neko Zerga Oinarrian kenkariak ahalbideratzen zituen. EAEn ezezik, Nafarroan ere martxan izan ziren.

Euskal erakundeek gogor ekin zioten neurrien defentsari, eta bi arau horiek dagoeneko bertan behera utziak zituztela argudiatu zuten. Europako Batzordeak, ordea, ohi zuen bideari jarraitu eta estatu laguntzak zirela erabaki zuen, ondorioz, batasunaren legediaren aurka-koak.

Helegiteen bidetik berriro

EBko ebazpena ezagutu zen unetik helegiteak aurkeztuko zirela iradoki zen Eusko Jaurlaritzatik eta Nafarroako Gobernutik. Abuztuko geldialdiaren ondoren gauzatu dira asmo horiek. Josu Jon Imaz Jaurlaritzako bozeramaileak azalduta-



MIREN SAEZ
Roman Sudupe Gipuzkoako Ahaldu Nagusia eta Josu Bergara, Bizkaikoa, bilera batean

koaren arabera, ekintza judizialak abiatzeko erabakia hartu dute. EBko ebazpenak «ezeztatze» eskatuko da aipatu helegiteotan. Lehenbizi, Europar Batasuneko Lehen Auzialdiko epaitegira joko du, eta, behar izatekotan, Europar Erkidegoetako Justizia Auzitegian kasazio

helegiteak aurkeztuko ditu. EA-Eko administrazioaren defentsa eramateko ardura Ramon Falcon y Tella abokatuak izango du. Falcon y Tella aditua da zerga legedietan.

Arabako Foru Aldundiak ere EBko zigorrari aurre egiteko asmoa ezagutarazi zuen atzo. He-

legiteak, gainera, Bizkaia eta Gipuzkoarekin elkarlanean prestatuko dituztela zehaztu zuen.

Erakundeek artean ez dute aditzera eman zeintzuk izango diren argudioak. Hala ere, enpresek dirua itzuli behar ez izatea lehentasuna da.

EUSKAL ARAU FISKALAK AUZITEGIETAN

Europako erakundeen aurrean, beti galtzaile

Europako Batzordeak euskal fiskalitatea aspal-ditik izan du jopuntuan, eta ez ditu artean Euskal Herriatik eman zaizkion argudioak ontzat eman. Ondorioz, EAEn zein Nafarroan martxan izan diren hainbat pizgarri fiskal estatu laguntzak direla erabaki du EBk, eta zigorrak ezarri dizkie. Jaurlaritzak, aldiz, zerga sistema propio eta osoa duela erreibindikatu izan du.

1996an hasi zen ametsgaiztoa. Daewoo-Demsa enpresa Araban kokatzeko akordioa sinatu zen, eta hainbat pizgarri eskaini zitzaizkion. Anfel, Ceded eta Anie hozkailu enpresek Bruselan salatu zuten, eta 1999an Europako

Batzordeak Daewoo eta Arabako Aldundiaren kontrako epaia kaleratu zuen. Urte berean Ramondin enpresari eskainitako tratua estatu laguntza zela erabaki zuen ere EBk, Errioxako Gobernuaren salaketa bati jaramon eginda. Aurtengo ekainaren 29an epaia berrikusi zuen Luxenburgoko auzitegiak, eta pare bat hilabete barru azken erabakia hartzea espero du.

Beste kolpeak 1999ko uztailean du abiapuntua. Karel Van Miert garaiko Lehiarako komisarioaren txostenari erantzuteko, EAE eta Nafarroako zazpi neurri fiskalei espedienteak zabaltu ziren. Erabakia joan den uztailaren 11n jakinarazi zuen Mario Monti gaur egungo komisarioak, eta Europako Batzordeak berriro zigortu zuen euskal fiskalitatea. Orain, zigor horri aurre egiteko beharrezko neurriak prestatzen ari dira euskal erakundeak.

Madrilgo helegite bat saihesteko arau fiskal bat moldatuko du Nafarroak

Agentziak | IRUÑEA

Nafarroako Gobernuak eta Madrilgoak osatzen duten Elkarlanerako Batzordean akordio bat iritsi zuten atzo Nafarroako Zerga Lege Orokorrean moldaketa batzuk egiteko. Aldaketa horiek egin ostean, Madrilgo gobernuak uko egingo dio Espainiako Auzitegi Konstituzionalean helegite bat aurkezteari.

Hilabeteko negoziazioen ondoren akordioa atzo iritsi zen Iruñean, Espainiako Administrazio Publikoetarako ministro Jesus Posada eta Nafarroako lehendakariorde Rafael Gurreak zuzendutako bilera batean.

Foru Gobernuak, akordio horren arabera, Nafarroako Parlamentuan Zerga Legea moldatzeko lege proiektu bat aurkezteko konpromisoa hartu du.

Lege proiektu horretan, hainbat artikuluren moldatzea jasotzen da. Horrela, 37. artikuluen bigarren puntua moldatu nahi da. Aldaketa horrekin helbide fiskalik aurkeztu ez duen eta aitorpena egitera behartuta dagoen pertsonaren helbidetzat hartuko da haren izenean dagoen edozein etxebizitza edo enpresa, «notifikazioak bidaltzeko».

38. artikulua ere aldatzeko asmoa du Foru Gobernuak. Erkidegotik kanpo domizializatutako subjektu pasiboei Nafarroak etxebizitza duen ordezkari bat izendatzeko exijitu ahal izango die Foru Ogasunak, baina «oso kasu berezietan eta, beti ere, arrazoituta».

69. artikulua ere moldatu nahi da, Ogasunak urtebeteko enplegu edo kargu publikorako urtebeteko suspentsioarekin zigor ditzakeenak «soilik kargu publikoetara mugatuz».